

triti agrè evaserunt & quasi siderati omnem sensum prorsus amiserunt. Author truculentæ carnificinæ in hunc diem nescitur : verum Anglus quidam, Edwardus Paris nomine, Comitis Hadintonii famulus, qui & ipse eadem clade periit, in facinoris inauditi suspicionem devocatur, quod & ipse tum armamentario præfuit, & fama exercitus Anglicani profligati & penitus dissipati ad vada Neorci, vulgo Neuburn, ad Præfecti aures paulò ante venerat, cuius rei indignatione extimulatum & clam exacerbatum Tenebrionem familiares produnt. Accedit quod & ipse homo nequam & supra omnes flagitiosissimus, solius heri fallaci opinione & infelici credulitate, amicis omnibus & bonis dehortantibus, ad id Officii fuerit promotus. Multa & alia palam jactitantur & varii rumores feruntur, quibus morari ordinem consilii haud sane operæ videtur : arx sub graminei montis radicibus sita est, ubi multæ perennes aquæ manant. Pingue solum est & fertilitate nobile ; causa fertilitatis est humor è montis radicibus manans, toto fere solo propter venas aquarum refudante. Pomorum quoque varii, salubresque luci sunt. Convalles quoque hortis & topiariis excultæ, & uberrima pastu prata se eadem viriditatis hilaritate porrigunt. Plura etiam naturæ debet hic locus, cuius facilitas & ingenium omnes artificum labores prævertit. ab arce ad septentrionem trecentis passibus ab ipso montis jugo pulchra

& sponte extensa planities est, in qua prædium vulgo Lanfield dictum, hinc atque hinc arbutis inter se implicatis & lentato vimine miscentibus nexus cinctum & pene cooperatum, densis undique fruticibus iisque lætissimis crebrarumque stirpium inæquali viriditate obumbratur. Optimi hic carbones in omnes usus, sed præsertim ad coquendum salem & calcem eruuntur : sunt & hic salinæ, in quibus sal ex aqua marina paratur. Templum Parochiale situm est mille passibus meridiem versus supra Dunglassiæ arcem, vulgo Oldhamstocleis dictum. Proximus Dunglassio ad orientem est saltus magno tractu à monte Leingupseid ad mare porrectus, cuius longitudo tribus millibus passuum extenditur, utrinque præruptis rupibus & naturæ munimentis impervius ; Scotiæ ex hac parte propugnaculum ingens : nam pauci hos fines huius munimentiope contra exercitum tueri possunt. Hic saltus Merciam à Lothiana secernit. Est & alius saltus ultra hunc prædiarius, mille pene passibus ad Orientem Cockburm saltus dictus & oppidum, quod à saltu nomen habet, in quo est templum Parochiale, cui ob propinquitatem & redituum tenuitatem adjecta est Parochia Oldcambus dicta, versus Orientem : in quo nihil præter pecorum & armentorum copiam & frugum profluentiam, quibus tota hæc regio abundat, insigne & memorabile est.

